



*Ora vi cuntù a storia ri n' autru personaggiu
ca ri nuomu si chiamava ron-Bbiaggiu.
Faci 'a spola ri m-Palermu a Mistretta
e ammucciuni vinnia pur 'a sicaretta.
Ogni tantu viaggiava cu Piulazza,
ca cuntrabbannava ca sicarittazza.
Nno trenu avia na valiggiazza ri cartuni
e facia finta ri lassalla agnuni-agnuni.
A tutti nni fici lu fauri,
ri m-Palermu purtava miricini e sciuri.
Ri Palermu sapia ogni purtusu,
ma rappriessu nun ci putia iri mancu n-carusu.
Quannu turnava ri m-Palermu
vinia pròpi 'a confusioni
ri quantu pacchi scinnà a stazioni.
Ogni tantu, a n'amicu l'anningava
quantu rà stazioni u ià-ppigghiava.
Era na scena taliari a so' suoru ca l'aspittava:
paria ca ri n-seculu mancava.
Era m-personaggiu assai stranu,
però alla fini era unu alla manu.
Prima ti ricia: "A Palermu? N-ci vaiu cchiù!"
E pui t'addumannava: "Ma tu, chi vvui?"
U so' recapitu era n-negozziu,
ma guai si ci ricievi "a putia",
picch' iddu frutta e verdura nu-nni-vinnia.
Ogni tantu ci purtavimu na serenata,
intra nni facièmu na bella cantata
e so' suoru, ri com'era allignata,
patati ni-nni ugghia na pignata.
U juornu ri San-Mrasi si festeggiava
e all'amici stritti l'ammitava
e prima c' a sirata cuminciava
facia u riscursu, ma s'emozionava.
L'amici ci facièmu m-pensierinu
e ci u mittièmu rintra n'pacchettinu,
ma avanti ca u riàlu l'attruvava,
pi n-zi-riri, nun-ci arrinunciava.*

*Rumani ca nuddu s'arrivorda ri tia
resta sulu na cruci, na scritta e na fotografia.*